



23. oktober 2024

UKA2024/104

**Aningaaserivimmik, kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqquneqarnissaannut Inatsisartut aalajangiiffigisassaattut siunnersuut. Nalunaarusiaq ukioq 2025 aallartinnerani Inatsisartunut agguanneqassaaq.**

*(Inatsisartunut ilaasortaq Jens Napaattoq, Naleraq)*

Siullermik siunnersuuteqartoq, Jens Napaattoq, Naleraq, qutsavigaarput oqaluuserisassatut siunnersuutaanut soqutigintumut.

Siunnersuutigineqarpoq, aningaaserivimmik kalaallinik tamakkiisumik amerlanerussuteqartunilluunniit pigineqartussamik pilersitsinissaq siunertaralugu, Naalakkersuisut nalunaarusiussasut. Siunnersuut Siumup ima paasivaa, Naalakkersuisut aningaaserivimmik pilersitsissasut.

Siunnersuummi tunngavilersuutigineqartut ilagaat, aningaasat Nunatsinniit anianerarneqartut pakkersimaarneqalersinnaasut, naalagaaffinngornissamut aningaaserivik toqqammavissat ilagissagaat aamma aningaaseriviit piusut marluk allamiunik tamakkiisungajammik pigineqartut nunatsinnit pigineqartumit ilalernerqartariaqartut.

Siunnersuuteqartup ilanngullugu tikkuarppaa, 2017-mi ukiakkut Inatsisartut assingusumik suliaqarsimasut. Tamanna ilumoorpoq, aamma taamani Inatsisartut siunnersuummut itigartitsipput.

Siumut isumaqarpoq, banki nutaaq Naalakkersuisunit pigineqartussaq qanoq nunatta aningaasarsiornernanut inuinillu allaanerusumik periarfissiissuteqarsinnaanersoq apeqqusernartoq. Bankimmi allatuulli niuerfiupput, inatsisillu atuuttut ataani ingerlasussaapput. Pisortat bankiliornerisigut atuisunut atugassiissutit allanngungaarnissaat ilimananngitsoq Siumut isumaqarpoq, tassami banki allatuulli A/S-iussaaq pisortat pigisaat, aningaasarsiortussarlu.

Siumut isumaqarpoq, siunnersuutigineqartumut tunngatillugu soqutiginassagaluartoq eqqartussallugu, nunatsinni Kalaallit aningaaseriviutaattut ilusilimmik, tassa nationalbankitut ilusilimmik, ilaannakortumilluunniit pilersitsisoqarsinnaappat, tamanna sutigut nunatsinni aningaasarsiornikkut iluaqutaanerusagaluarnersoq. Siunnersuummili tamanna pineqanngimmat itisilernerussanngilarput.



Taamak oqaaseqarluta pineqartoq Inuussutissarsiornermut Aatsitassanullu Ataatsimiititaliami nalilersorneqaqqissappat ammaffigaarput.

Karl Tobiassen  
Siumut